





、不善心。是應集成，一切業，若晝、若夢、皆從因緣生，無因緣則不生。思有因緣生，無因緣不生。業者、身、口業，思者、但意業；思是眞業，身、口業爲思故名爲業。是三業因四種法，若見、若聞、若覺、若知，因此四種則心生；是心隨因緣生、或淨或不淨。不淨罪業，淨福業。

是故，若夢中所見，皆因先見、聞、覺、知。夢中所作善惡，爲眠覆心，不自在故，無有勢力，不能集成果報。若是業得覺時，善惡心和合故，能助成果報。諸法雖空遠離相，而凡夫取相，有緣故業生，若不取相，無因緣則不生。是故，一切業，皆從取相因緣生故有，晝日、夢中無異。

菩薩夢中行六波羅蜜，迴向無上道，是實迴向不？菩薩法，應知空、無相、無作法，不應証。既知是法空、無相、無作，云何得見？若見即是有相，肉眼、天眼分別取相，故不應見；慧眼無分別相，故亦不見。以是故，佛言：菩薩摩訶薩行般若波羅蜜，得無生忍，不作是言：見是法得受記，當得無上道。雖不作是見，亦不生疑，我不得無上道。

佛告須菩提：「有菩薩摩訶薩，行檀波羅蜜時，若見衆生饑寒凍餓，衣服弊壞，當作是願：我隨爾所時行檀波羅蜜，我得阿耨多羅三藐三菩提時，令我國土衆生無如是事，衣服、飲食，資生之具，當如四天王天……他化自在天。

行尸羅波羅蜜時，見衆生殺生乃至邪見，短壽多病，顏色不好，無有威德，貧乏財物，生下賤家，形殘醜陋，當作是願：我隨爾所時行尸羅波羅蜜，如我得佛時，令我國土衆生無如是事。菩薩摩訶薩行瞋提波羅蜜時，見諸衆生瞋恚罵詈，刀杖瓦石共相殘害奪命，當作是願：我隨爾所時行瞋提波羅蜜，令我國土衆生，無如是事，相視如父、如母，如兄、如弟，如姊、如妹，如善知識，皆行慈悲。

菩薩摩訶薩行毗梨耶波羅蜜時，見衆生懈怠，不動精進，棄捨三乘：聲聞、辟支佛、佛乘；當作是願：我隨爾所時行毗梨耶波羅蜜，如我得阿耨多羅三藐三菩提時，令我國土衆生無如是事。一切衆生勤修精進，於三乘道，各得度脫。

菩薩摩訶薩行禪波羅蜜時，見衆生爲五蓋所覆：淫欲、瞋恚

、睡眠、掉悔、疑，失於初禪，乃至第四禪，失慈、悲、喜、捨；虛空處、識處、無所有處、非有想非無想處。當作是願：我隨爾所時行禪波羅蜜，如我得阿耨多羅三藐三菩提時，令我國土衆生無如是事。

菩薩摩訶薩行般若波羅蜜時，見衆生愚癡，失世間、出世間正見，或說無業、無業因緣，或說神常，或說漸滅，或說無所有。當作是願：我隨爾所時行般若波羅蜜，淨佛世界，成就衆生，如我得阿耨多羅三藐三菩提時，令我國土衆生無如是事。

菩薩摩訶薩行六波羅蜜時，見衆生住於三聚：一者、必正聚。二者、必邪聚。三者、不定聚。當作是願：我隨爾所時行六波羅蜜，淨佛世界，成就衆生，我得佛時，令我國土衆生無邪聚，乃至無其名。

菩薩摩訶薩行六波羅蜜時，當作是念：雖生死道長，衆生性多。爾時，應如是正憶念：生死邊如虛空，衆生性邊亦如虛空，是中實無生死往來，亦無解脫者。菩薩摩訶薩應如是行，能具足六波羅蜜，近一切種智。」

菩薩過聲聞、辟支佛地，得無生忍受記，更無餘事，唯行淨佛世界，成就衆生。今說淨佛世界因緣，見不淨世界相。願我國土無如是事，是故，佛次第說菩薩行六波羅蜜。菩薩行檀波羅蜜時，若見衆生饑渴，衣服弊壞，即作念言：我福德智慧未成就，不能給足衆生所需。若我但行慈悲心，則於衆生無益，我當爾所時，深行三種福德，住三種福德中，能令貧窮衆生皆得滿足：若作轉輪聖王，若作天王，若作神道聖人，則能多引導衆生，破其慳貪，令住佈施。以是衆生布施，乃至菩薩布施因緣故，後成佛國，國土中無有貧窮者，心生隨意所得，如欲界第六天所有諸物。菩薩如是隨爾所時，積集檀波羅蜜功德故，充滿一切。何以故？一切有爲法屬因緣，行善因緣具足故，皆應隨意得果報。

衆生破尸羅波羅蜜因緣故，短命多病，無有威德等。菩薩作是願：我自具足戒，亦教衆生令持戒。餘殘諸願亦如是，隨義分別。十方世界衆生，無量無數，菩薩作如上願已，疲厭心起：佛道無量無數阿僧祇劫行諸功德，然後可得；但一切歲數不可得數，故佛以譬喻示人，何況無量無邊阿僧祇劫，經此生死，受諸苦

惱，衆生亦無量無邊，非可譬喻算數所及，但如三千大千世界中微塵等衆生，猶尚難度，何況十方無量世界微塵等衆生而可得度？以是事故，或心生退沒，是名邪憶念。

是故，佛教是菩薩正憶念：生死雖長，是事皆空；如虛空、如夢中所見，非實長遠，不應生厭心。又未來世亦是一念所緣，亦非長遠。菩薩無量智慧力故，能超無量劫。如是種種因緣故，不應生厭心。

此中佛說大因緣：所謂生死如虛空，衆生亦如是；衆生雖多，亦無定實衆生，如衆生無量無邊，佛智慧亦無量無邊，度亦不難，是故菩薩不應生疲厭心。

佛告須菩提：「若菩薩摩訶薩乃至夢中不貪聲聞、辟支佛地，亦不貪三界，觀諸法如夢、如幻、如響、如燄、如化，亦不作證。當知是阿鞞跋致菩薩摩訶薩阿鞞跋致相。菩薩摩訶薩夢中見佛，與無數百千萬億比丘、比丘尼，優婆塞、優婆夷等說法，從佛聞法，即解中義，隨法行。

菩薩摩訶薩夢中見佛三十二相，八十隨行好，大光明踔在虛空，於大比丘僧中說法；現大神力，化作化人，到他佛國土施作佛事，當知是阿鞞跋致菩薩摩訶薩阿鞞跋致相。

菩薩摩訶薩夢中見興起破聚落，若破城邑，若失火時，若見虎狼獅子猛害之獸，若見欲來殺其首者，若見父母喪亡，兄弟、姊妹，及諸親友知識死者，見如是等種種愁苦之事，不驚、不怖，亦不憂惱，從夢覺已，即時思惟：三界虛妄，皆如夢耳。我得阿耨多羅三藐三菩提時，亦當爲衆生說三界如夢。

菩薩摩訶薩夢中見地獄、畜生、餓鬼，作是念：我當勤精進，得阿耨多羅三藐三菩提時，令我國中無一切三惡道，何以故？是夢及諸法，無二無別。

菩薩摩訶薩夢中見地獄火燒衆生，作是誓：若我實是阿鞞跋致者，是火當滅！是火即滅。若地獄火即滅，是阿鞞跋致相。

若菩薩晝日見城廓火起，作是念：我夢中見阿鞞跋致行、類、相貌，我今實有是者，自立誓言：是火當滅，若火滅者，當知是菩薩得受阿耨多羅三藐三菩提記，住阿鞞跋致地。若火不滅，燒一家、置一家，燒一里、置一里，當知被燒家破法業因緣集厚

。是諸衆生今世受破法餘殃故被燒。

以是因緣故，當知是阿鞞跋致菩薩摩訶薩阿鞞跋致相。

阿鞞跋致菩薩，夢中不貪二地，雖未具足阿鞞跋致法，亦名阿鞞跋致。是菩薩晝日常習行空故，夜夢中亦不貪三界：是人常行慈悲心於衆生，深樂佛法故，不貪二乘；若夢、若覺，觀一切法如夢、如幻等。

是菩薩雖未得現前受記。餘法未具足，亦名阿鞞跋致相。何以故？菩薩於二處退轉：一者、著世間樂故轉。二者、取二乘故轉，是菩薩堅心，深入空及慈悲心故，乃至夢中亦不貪三界、二乘，何況覺時！

菩薩夢見佛在人天大眾中說法，所謂諸法實相義。菩薩知是義，心與法合。諸佛秘密法，菩薩夢中得見，所謂見佛身無量，過須彌山，色如閻浮檀金，三十二相，八十種隨行好，以自莊嚴。放無量光明，梵音聲說法，及身毛孔出無量化佛至十方，種種方便力施作佛事，度脫衆生。爾時，是菩薩見是佛神力故，深心清淨問佛法，得諸法實相，是名阿鞞跋致。

是菩薩常行畢竟空故，我、我所等諸煩惱折薄，乃至自身不惜，何況餘親！是因緣故，若夢中見：若自身、若父母，若殺、若死因緣，及聚落破等，不憂惱怖畏，覺已思惟：如夢中不死而見死，不畏而見畏，一切三界皆爾，何但夢中，我作佛時，當爲衆生爲說諸法畢竟空皆如夢。

有菩薩種種清淨國土因緣時，作是願：我爾許時積集淨國土行。是心修習故，夢中若見三惡道衆生時，即得是心：我作佛時，令我國土乃至無三惡道名。是菩薩常修慈悲心故，夢中見地獄火燒衆生，作誓，火即滅。覺已，取是相，若見實火燒城廓，作是念：我夢中能滅火，此火亦當可滅！所以者何？佛說夢、覺無異故。是菩薩於無量劫修習福德，得諸法實相故，鬼神、龍王等助滅是火。其中有不滅，燒一家置一家者，是衆生重罪故。菩薩福德智慧力，不能滅重罪者，所謂破法業。法者，般若波羅蜜，諸餘法利益，無及般若波羅蜜者，是故破者罪重。以菩薩誓力故，不次第燒，唯罪重者不救，不妨是阿鞞跋致相。